

Incumbensa Bigliel concernent «Cunter il traffic da guntgida tras ils vitgs per lung da la A13 e da la via naziunala N28 (via dal Partenz)»

La tematica è enconuscenta gia pli ditg ed è ina malempernaivladad en blers vitgs (cf. dumonda Hefti concernent la sortida d'autostrada a Zizers dals 27 d'avust 2021). Durant las fins d'emna chaschuna il grond volumen da traffic sin l'autostrada A13 regularmain colonnas da Giuvaulta fin Murg. Quai surmaina bleras participantas e blers participants dal traffic da prender la «via secreta» tras ils vitgs. Uschia arrivian ils systems da traffic communalis a lur cunfins, e las abitantas ed ils abitants èn cha-paivlamain malcontents cun questa situaziun. Pli e pli savens vegni rapportà dal privel che las organisaziuns a glisch blava na possian betg pli ademplir adequatamain lur funcziuns durant las fins d'emna pervia da la situaziun da traffic, ch'ils bus hajan retard e che la qualitat d'abitar da la populaziun indigena sa reduceschia.

Las medias han rapportà che represchentantas e represchentants da las regions Viamala, Plaun, Plessur, Landquart e Sargans sajan sa scuntrads e veglian agir cuminaivlamain en questa chaussa. En quest connex è prevista la fin da mars 2022 ina scuntrada da las vischnancas ch'èn situadas per lung da la A13 e da la citad da Cuira cun la Polizia chantunala, cun l'Uffizi da construcziun bassa dal Grischun e cun l'Uffizi federal da vias UVIAS. Represchentantas e represchentants dal chantun Son Gagl n'èn betg vegnids envidads a quests discurs. Gist uschè nuncuntentavla è la situaziun actuala per il Partenz, perquai che la N28 funghescha sco via d'access a la A13.

Sut quest aspect incumbensescha il Cussegl grond resp. incumbenseschan las sutsegnadras ed ils sutsegnaders da questa incumbensa la Regenza:

1. da sustegnair cun gronda prioritad las vischnancas pertutgadas per lung da la A13 e da la via naziunala N28, per ch'i saja pussaivel da chattar ina soluziun svelta e persistente dal problem per la populaziun. Il chantun Grischun sustegna las vischnancas en moda coordinativa e tschertga activamain il barat cun il chantun Son Gagl;
2. d'examinar cun las vischnancas en spezial, sch'il traffic da guntgida tras ils vitgs po vegnir minimà tras in scumond temporar da charrar durant las fins d'emna cun la tavla supplementara «Permess mo servetsch d'apport». L'Uffizi federal da vias UVIAS ed il chantun Berna han realisà – en collavuraziun cun la vischnanca da Muri-Gümligen – ina soluziun sumeglianta per la nova concepziun dal nuf stradal Muri 2017–2019;
3. da perseguir vinavant mesiras accompagnantas per reducir en moda persistente il «traffic nair» tras ils vitgs e tras ils abitadis. Uschia duai il chantun sutta-meter al servetsch da chartas Google Maps (en enclegientscha cun il chantun Son Gagl) il giavisch ch'i na vegnia proponida a las utilisadras ed als utilisaders nagina ruta da guntgida tras ils vitgs en cas da colonnas.

Questa incumbensa è ina intervenziun schumellina che vegn inoltrada a medem temp er en il Cussegl grond dal chantun Son Gagl en furma d'ina «dumonda ordinaria», per uschia cuntanscher in proceder interchantunal.

Cuira, ils 16 da favrer 2022

Bigliel, Holzinger-Loretz, Danuser, Berweger, Cahenzli-Philipp, Caviezel (Cuira), Censi, Claus, Della Cà, Della Vedova, Engler, Florin-Caluori, Flütsch, Hartmann-Conrad, Hohl, Jochum, Kasper, Kienz, Kohler, Kunz (Cuira), Kuoni, Loi, Märchy-Caduff, Marti, Michael (Castasegna), Mittner, Natter, Niggli (Samedan), Niggli-Mathis (Grüsch), Noi-Togni, Papa, Pfäffli, Rüegg, Sax, Schutz, Stiffler, Thomann-Frank, Thür-Suter, von Ballmoos, Waidacher, Wellig, Wieland, Zanetti (Landquart), Bisaz